



Inatsisartut Aningaasaqarnermut Akileraartarnermullu Ataatsimiititaliaat

UPA 2023/62 pillugu Aningaasaqarnermut Akileraartarnermullu Ataatsimiititaliaap apeqqutaasunut akissut

Brevdato: 27-05-2023
Sagsnr.: 2023 - 6746
Akt-id: 23039641

Aningaasaqarnermut Akileraartarnermullu Ataatsimiititaliaap UPA2023/62-imik suliaqarneranut atatillugu ataatsimiititaliaq suliamut tunngasunik apeqquteqarpoq. Matuma kinguliani ataatsimiititaliaap apeqqutai akineqarput.

Postboks 1614
3900 Nuuk
Tlf.: (+299) 34 50 00
Fax: (+299) 34 54 10
E-mail: pan@nanoq.gl
www.naalakkersuisut.gl

Apeqqut 1.

Siunnersuuteqartoq assigalugu oqariartaaseq “ajunaarnersuarmut assingusumik” Naalakkersuisunit atorneqarpoq. Oqariartaaseq taanna Naalakkersuisut akissuteqaataanni aammalu aningaasanut inatsimmi suliaqarfimmut 10-89-imut – Naalakkersuisunut tunngasumut – oqaasertaliussa q nr. 7-imut nassuiaatini atorneqarpoq:

”Oqaasertaliussat innuttaasunut ajunaarnersuarnik ajutoornernillu eqqugaasunut, soorlu umiarsuit umiunerisigut, timmisartut ajutoornerisigut, pinerlunniatigiti saassussinerisigut, pinngortitarsuup ajunaartitsineratigut, qaartoortoqarnikkut allatullu siumut oqaatigereerneqarsinnaanngitsumik ajunaarnersuartut isikkulimmik pisoqarneratigut eqqugaasunut Kalaallit Nunaanni aalajangersimasumik najugalinnut tunngatitaapput.”

Oqaatsit ‘ajunaarnersuarmut assingusumik’ arlaalinnik isumaqartinneqarsinnaanera pissutigalugu oqariartaatsip ‘ajunaarnersuarmut assingusumik’ suliami matumani qanoq paasineqarnissaa allakkatigut nassuiaatigeqqullugu Naalakkersuisut ataatsimiititaliamit qinnuigineqarput. Tassunga aamma ilanngullugu pisup ajunaarnersuartut assingusut imaluunniit taamaanginneranut suut tunngaviutinneqarsinnaanersut Naalakkersuisunit eqqarsaatigineqarsimanersoq paasissutissiissutigineqassasoq ataatsimiititaliamit kissaatigineqarpoq.

Apeqqut 1-imut akissut.

Oqaatsip “ajunaarnersuarmut assingusumik” paasinnissaanut oqaatsip “ajunaarnersuaq” paasineqaaqartariaqarpoq. Ajunaarnersuaq amerlanertigut tassaasarpog ajutoorneq imaluunniit tassangaannartumik pisoq, inunnik, pigisanik avatangiisinillu ajoqusiinernik, najukkani inuiaqatigiinnit oqartussaasunillu ulluinnarni isumalluutit pissarsiarineqarsinnaasut atorlugit isumagisinnaasaannit annertunerusunik peqquteqartoq.

Taamatut taaguusiinermi oqaatigissallugu pingaaruteqarpoq, ajunaarnersuaq tassaammat tassangaannartumik pisoq amerlanertigullu pisumik naatsorsuutigeriingisamik peqquteqartoq.

Tassalu Naalackersuisut “ajunaarnersuarmut assingusumik” pillugu nassuiaataat tassaavoq pisoq, tassangaannartumik naatsorsuutigeriinngisamillu peqquteqanngitsoq, kisiannili inunnut, pigisanut avatangiisinullu ajoqusiinerit, najukkani inuiaqatigiinnit oqartussaasunillu ulluinnarni isumalluutit pissarsiarineqarsinnaasut atorlugit isumagisinnaanngitsoq.

Apeqqu 2.

Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugu Inatsisartut inatsisaat pillugu siullermeerinninnermut akissuteqaamminni Naalackersuisut ima paasissutissiipput:

”Aalisarneq piniarnerlu silap pissusaata allanngoriartorneranit ajornakusoortillugu imaluunniit inuussutissarsiorneq pisinnaanngippat, aalisartut piniartullu aningaasaqarnikkut ikiorserneqarnissamik qinnuteqarsinnaanerannut periarfissaq annertusiniarlugu inatsit nutarterneqaleruttorpoq”

Tassunga atatillugu inatsimmik taamatut nutarterineq akissuteqaammi allassimasut saniatigut allannguutininik tigussaasunik sunik nassataqassanersoq paasissutissiissutigineqassasoq ataatsimiititaliamit kissaatigineqarpoq, Naalackersuisummi allannguutissatut siunnersuutaannut inatsit taanna tunngaviummat.

Apeqqu 2-mut akissut.

Aalisarnermut Piniarnermullu Naalackersuisoqarfik ilisimatitsivoq, naalackersuisoqarfimmiit siunnersuut suliarineqartoq, tassungalu aalajangersagaq, siunissami aalisartut piniartullu silap pissusaata allanngornera tunngavigalugu immikkut ittumik pisoqarnera peqqutigalugu inuussutissarsiornikkut periarfissaminnik annaasaqarsimasut, taamaalillunilu imminut pilersornissaannut annikinnerusunik periarfissaqalersimasut taparserneqarnissaannut periarfissiiffiususaaq ilanngunneqassasoq.

Tassunga ilanngullugu silap pissusaata allanngornerani imaluunniit silap pissusaanik peqquteqartumik ajornartorsiulernermi piniarnikkut qimminut nerukkaatissanik pissarsisoqarsinnaajunnaartillugu qimminut nerukkaatissanik pisiniarnissamut tapiissuteqartoqarsinnaalernissaa siunnersuutigineqarpoq. Taakku tassaapput maannamut annaasaqarnermi aallartitseqqinnissamut periarfissiisarnernut annertusissutaasussat. Silap pissusaata allannguutaanut immap sikunngitsoornera assersuutaasinnaavoq.

Inatsimmut allannguutissatut siunnersuutit maleruagassat malillugit siunnersuutip Inatsisartunut inaarutaasumik saqqummiunneqarsinnaalernissaa sioqqullugu suliaasaqarfiup iluani avammullu tusarniaassutigineqassapput.

Apeqqu 3.

Inatsisit atuuttut sooq atorneqarsinnaannginnerat paasissutissiissutigineqassasoq ataatsimiititaliamit naggasiullugu kissaatigineqarpoq

Apeqqut 3-mut akissut.

Kalaallit Nunnaanni ullumikkut inatsiseqarpoq, aalisartunut, piniartunut savaatilinnullu, ajunaarnersuarnut assingusunut eqqorneqartunut ikiorsiinissamut periarfissiisunik. Tamanna siunnersuummut akissuteqaataani erseqqissaassutigineqarpoq.

Aalisartunut, piniartunut savaatilinnullu aallarteqqinnissamik tapiisarneq pillugu inatsimmi allannguutissanik nassataqassaaq. Annaasaqarnermi aallarteqqinnissamit tapiissutit annertusineqassapput. Takuuk apeqqummi 2-mi itisilerlugit nassuiaatit.

Inussiarnersumik inuulluaqqusillunga



Kalistat Lund